

## შედეგი მეორე ნახევარში

თბილისი. 23 სექტემბერი. “ბურევესტნიკის” სტადიონი.

“დინამო” (თბილისი) – “ავანგარდი” (ხარკოვი) 2:1 (0:0).

“ავანგარდი”: უგრაიცი, ონისკო, შიშკოვი, სოკოლოვი, ტოდოროვი, ოჟერედოვი, ნესტეროვი, კოსტიუკი, პანფილოვი, კოროლიოვი, ხაჩატუროვი (კრომჩენკო).

“დინამო”: კოტრიკაძე, ბ. სიჭინავა, ჩოხელი, ხოჭოლავა, ზეინკლიშვილი, ხელაძე, დათუნაშვილი (მელაშვილი), ბარქაია, კალოევი, იამანიძე, მესხი.

მატჩს სჯიდა კრასნოდარის მხარის მსაჯთა ბრიგადა ლ. სარქისოვის ხელმძღვანელობით.

მატჩის დასაწყისშივე აშკარა გახდა სტუმრების ამოცანა: რადაც არ უნდა დასჯდომოდათ, უვნებელეყოთ თავიანთი კარის მისადგომები. ამ მიზნით უკან იყვნენ დაწეულნი შუამარბები კოსტიუკი და კოროლიოვი, ხოლო ცენტრალურ თავდამსხმელს დავალებული ჰქონდა პერსონალური მეთვალყურეობა გაეწია ბარქაიასათვის, არავითარ შემთხვევაში არ მიეცა მისთვის თავისუფალი მანევრირების საშუალება. ყოველივე ამან სტუმრები თავისთავად მიაჯაჭვა საკუთარ კარს და ცხადია, წინ დარჩენილ სამ თავდამსხმელს თბილისელთა კარზე უშუალო საფრთხის შექმნის ნაკლები შანსები რჩებოდათ.

სტუმრების ამგვარმა ტაქტიკამ და აგრეთვე სველმა გრუნტმა საგრძნობლად გაუმწელა თამაში თბილისელებს, მათ საკმაო ხანი მოანდომეს ხარკოველთა კარისაკენ მისასვლელი გზის ძიებას. სწორედ ამ ძიების დროს გაუშვეს სტუმრებმა ხელიდან ანგარიშის გახსნის შესაძლებლობა, როცა მარჯვენა გარემარბმა ნესტეროვმა ვერ გამოიყენა კარიდან კოტრიკაძის დროული გამოუსვლელიობა. ფაქტიურად ეს იყო ხარკოველთა ერთადერთი შანსი გოლის გატანისა.

მე-5 წუთიდან თბილისელი ფეხბურთელები დასახლდნენ ხარკოველთა ნახევარზე და მარცხენა ფრთამ მესხი-იამანიძე, რამდენიმე სახიფათო გარღვევა განახორციელა. ერთ-ერთი ასეთი გარღვევისას, ბარქაიას ძლიერი დარტყმა შემთხვევით მოხვდა ცენტრალურ მცველს შიშკოვს და ბურთი გავიდა თავისუფალზე. ხან მარჯვენა, ხან მარცხენა ფრთიდან იერიში იერიშს მოსდევდა. მათი დამწყებნი უდაოდ აქტიურად მებრძოლი ნახევარმცველები იყვნენ, ხშირად იქმნებოდა კარის აღების რეალური შესაძლებლობანი, მაგრამ საკმაოდ შეთანხმებით თამაშობდნენ ხარკოველი მცველები და მეკარე ან თბილისელი თავდამსხმელები ვერ იჩენდნენ სათანადო სიზუსტეს კარში დარტყმის დროს. იყო ისეთი მომენტიც, როცა იამანიძის, ბარქაიას, დათუნაშვილის დარტყმები ზედიზედ მოიგერია უგრაიციმ.

მესხის მანევრებს თანდათან აულო ალლო ორივე “დარაჯმა” და იგი ერთხანს გამოთიშეს კიდევ თამაშიდან, მაგრამ თბილისელთა მარცხენა გარემარბს ფარ-ხმალი როდი დაუყრია – მთელი ენერგიით იბრძოდა, ეძებდა და მოსვენებას არ აძლევდა მოწინააღმდეგეთ. ამ დღის თამაშით უდაოდ ქების ღირსია თბილისელთა კაპიტანი იამანიძე.

პირველი ტაიმის დამთავრებამდე რამდენიმე წუთით ადრე, ტრავმირებული დათუნაშვილი შეცვალა მელაშვილმა, რომელმაც მეორე ნახევარში გაბედულად ითამაშა და საკმაო დაბნეულობა შეიტანა სტუმრების დაცვაში, მაგრამ ჩქარობდა, სათანადოდ ვერ ითვალისწინებდა სველ გრუნტს და შედეგს ვერ აღწევდა. ბოლოს ისევ მელაშვილმა შეძლო ხარკოველთა მისადგომების “აღება”, როცა ბარქაიას წამოწყებული კომბინაცია, სუსტი, მაგრამ ზუსტი დარტყმით დაავგირგვინა - 1:0.

ეს იყო მატჩის 72-ე წუთზე. ზუსტად 8 წუთის შემდეგ სტუმრებმა განმეორებით დაიწყეს თამაში ცენტრიდან, ამჯერად გოლის ავტორი იყო მესხი, მაგრამ ამაში სათანადო დამსახურება ისევ ბარქაიას მიუძღვის, რომელმაც გადაინაცვლა რა მელაშვილის ადგილზე, განახორციელა ღრმა რეიდი და ჩააწოდა საჯარიმო მოედანზე. კალოევის დარტყმული ბურთი ცუდად მიიღო უგრაიციმ, ბურთს მიუსწრო მესხმა და... 2:0.

მხოლოდ ამის შემდეგ შეცვალეს დაცვითი ტაქტიკა სტუმრებმა და მატჩის უკანასკნელ წუთზე კოროლიოვმა შეძლო ერთი გოლის გაქვითვა.

ამრიგად, თბილისის “დინამომ” მოიგო მეთექვსმეტედფინალური მატჩი საბჭოთა კავშირის თასზე. მორიგ მატჩს თასზე ისინი ითამაშებენ სტალინოში, “შახტიორთან”.

**დ. ცომაია, საბჭოთა კავშირის დამსახურებული მწვრთნელი; ო. გელაშვილი.**

“ლელო”, 24 სექტემბერი, 1961 წ.